

“O rotogetše legodimong
gomme nea batho dineo.”



*Bohlatse bja Mor. William Branham
ka ga go tla ga neo*



Mor. William Marrion Branham

“O rotogetše legodimong gomme nea batho dineo.”

Mabapi le go tla ga mpho ye ya phodišo, nka fo le anegela ka ga ponagalo bjalo ka ge e tlile go nna. Ke tumelo ya ka ye e tletšego gomme e botegago gore dimpho di beelwa-pele ke Modimo. Ba bantši ga ba dumele ka ga peelo-pele, eupša e kgonthišwa ka mangwalo gore ditiragalo tše ntši tša Beibele di ile tša beelwa-pele ka semoya. Go fa mohlala, matswalo a Kriste a beetšwe-pele go tšwa Serapeng sa Edene. Gomme nywaga e ka bago e 712 pele ga go tla ga Johanne Mokolobetši, Jesaya o bone gomme a bolela ka yena bjalo ka lentšu la segoledi lešokeng. Moporofeta Jeremia o boletše gore pele a bopša ka mpeng ya mmagwe, Modimo o mo tsebile gomme a mmea moporofeta ditšhabeng. Ke dumela gore peelo-pele e na le maikarabelo ka mpho ye ka lebaka le gape: Ke be ke hloka motheo wa sedumedi. Batswadi ba ka e be e le ba di tumelo di šele gomme ka 'baka leo, ga se nka ka ya kerekeng.

La mathomo ge ke tlelwa ke tlhaloganyo ya se bokamoso bo se swerego, ke be nka ba le nywaga e šupago, ke sa tš'wa go thoma sekolo lefelong la naga-legae meelo e se mekae lebowa la Jeffersonville, Indiana, mo tate e bego e le mootledi wa mmotoro wa lapa la bahumi. Ke be ke fela ke rata go thea dihlapi le go tsoma. . . e bile le tshokologo ya ka ga se ya tloša seo mo go nna. . . gomme mosegare woo wa mafelelo a Setemere ba bangwe ba bašimane ba be ba ile tlase moo nokeng ye e tletšego dihlapi go thea, ge ke be ke sa ile go gela tate meetse. Ke manyami go le botša gore meetse ao a be a ile go šoma eng. Tate o be a enwa kudu, gomme ka yona nako ye ba be ba dira

bjala, ka fao ka swanelwa ke go gelelela meetse moo bo-apeelong, moo ba bego ba eya go bo dira bošego bjoo. Ge ke theogela tseleng, ke bea motomo wa ka wa todi fase gomme ka wela fase tlase ga mohlare go khutša lebakanyana, ke lla ka ge nka se kgone go ya go thea dihlapi le bašimane ba bangwe. Ke sa dutše moo kgauswi le mohlare, se sengwe sa direga seo nka se se lebalego. Go bonagala, go be go na le modumo wa phefo e tšutlaglo mahlareng, eupša, ge ke lebelela godimo, ka se ke ka bona mahlare a tšokotšwa le ge e ka ba sekä sa phefo. Ka dula ka homola, ke gakanegile e bile ke maketše gore lešata leo le tšwa kae, ge ke le kwa gape, ka fao ka topa motomo waka gomme ka wela tsela. Nako ye le tlie gape, le feta lela la pele, gomme ge ke lebelela morago go bona gore go diregile eng, ka lemoga gore go ka ba seripa go ya ntłohlong ya mohlare go bonala sedingwadingwane, seo go sona go tšwilego lentšu le le kwalago la re: "O seke wa kgoga, wa nwa, goba wa itšhilafatša mmele ka tsela efe goba efe, gobane go tlo ba mošomo wo o tlogo o dira ge o gola." Ke be ke tšhogile o šoro ke sa tsebe gore nka dirang. Ge ke lla ebile ke kitimela gae, ka wela matsogong a mma, yo a ilego a gopola gore ke lomilwe ke nogá. Ka mmotša gore ke no tšhoga, ka fao a mpea malaong gomme a ya go bitša ngaka, a nagana gore ke tšhogile kudu. Bjale, bagwera, ke lemogile gore ba bantši ba ka kwera tabeng ye, eupša nka se be le maikarabelo a seo ba bangwe ba se bolelago. . . Ke fo ba le maikarabelo a se ke se bonego. Ga go bohlokwa go bolela, gore ga se ka hlwa ke eya moo mohlareng le gatee. Ke be ke arogela tlase thoko e nngwe ya tšhemmo go tšhaba seo, gobane ke ile ka gopola gore go na le motho kua godimo ga mohlare. Gomme le bjale ke sa gopola gore go na le monna moo mohlareng. E be e le morongwa wa Modimo, gomme ka morago mengwageng, ka kopana nae sefahlego ka sefahlego gomme ka bolela le yena.

Dibeke di se kae ka morago ga seo, ke be ke bapala dimabolo le ngwanešu, ge ke ekwa se se makatšago. Ka wela

kgauswi le mohlare, gomme, bjalo ka ge nke ke swerwe ke bolwetši bja go wa, ka bona sepane se segolo se rotoga gomme sa putla noka, gomme ka lebelela ge palo e ntši ya batho e wela ka nokeng gomme e kgangwa. Ge ke welwa ke maruru, ka kitima gomme ka botša mma, gomme a fetša ka gore ke nna ngwana wa go tšhoga. Nywaga e masome-pedi-pedi go tloga nako yeo, leporogo la Mmasepala la hlongwa go putla Noka ya Ohio, gomme yona palo yela ya bašomi ya kgangwa, ba wa leporogong. Le a bona, dilo tše ga se tša tšwelela ka thapelo goba tlhologelo, eupša di beetšwe-pele ka thato ya Modimo ya semoya.

Tiragalo e latelago ya mohuta wo e tlile tekanyo ya letšatši ge ke eya nokeng le tate le monna yo mongwe. Ba ile ba mpha senwewa sa khatšha, gomme ka ge ke be ke nyaka gore monna yola a nthate ka fao o tlo nkadima seketswana sa gagwe, ka thoma go tšea senwewa. Eupša ka kgonthe bjalo ka ge ke bolela lehono, ke kwele modumo woo bjalo ka mahlare ge a tšutšutiwa. Ge ke retologa, gomme ke sa bone mahlare goba seka sa phefo, ka bea lebotlolo molomong wa ka gape, ge ke ekwa lešata lona lela, le hlatlogile fela. Letšhogo la nkaparela bjalo ka la pele; ka lahla lebotlolo gomme ka tšhaba, ge tate a mpitša lefšega. A, ka fao se se hlabago! Ka morago ga fao, ke ile ka bitšwa lefšega ke mogwera wa ka wa mosetsana ge ke mmotša gore ga ke kgoge. Ke befedisitšwe ke dikwero tša gagwe, ka tšea sekerete gomme ka ya go e kgoga go le bjalo; ge ke be ke tlemilwe ke lentšu leo le tlwaelegilego, le nkgapeletša go lahla sekerete gomme ka tloga tiragalang yeo ke lla gobane nka se swane le batho ba bangwe, ge dikwero tša lešaba di kwala ditsebeng tšaka. Tše ke tše dingwe tše ntši tše go swana le tše di diregilego mo bophelong bjaka. Go be go fela go etla gona go ikwa moo go sa tlwaelegago, go swana le ge yo mongwe a eme kgauswa ga ka, a leka go mpotša se sengwe, gomme gagologolo ge ke le nnoši. Go be go se yo a bonalago a

nkwešiša le gannyane. Bašimane ba ke bego nka ikgweranya le bona ba be ba sa dire selo ka nna gobane nka se kgoge goba ka nwa, le basetsana bohole ba be ba eya mminong, woo nka se kego ka o dira le wona, ka fao gwa bonala gore bophelong bjaka ka moka ke be ke le nku e ntsho, ke sa tsebe motho yo a nkwešišago, le nna ke sa ikwešiše. Eupša ka nako yeo ga se ka tseba se bokamoso bjo bogolo bo bego bo se swere bjalo ka ge ke tseba bjale.

Tiragalo e bohlokwa e latelago ye ke e gopolago e tlile ge ke batametše nywaga e lesome-senyane. Ke be ke feta moo go bego go direlwa meletlo ya mmino bošego bjo bongwe le bašimane ba bangwe, ge lentšu le bitsa, "Le re, wene! Etlamo!" Ge ke lebelela morago, ka bona kgarebe e nnyane e dutše ka fase ga mokutwana, motsebi wa dinaledi. A šuthela gonna gore ke tle go yena, gomme, ke gopola gore a nyaka gore ke mo direle se sengwe, ka dumela. A re, "Nk'ore, a o a tseba gore o belegwe ka fase ga seka gomme go na le naledi e a go latela? O belegwe le mpho." Go bjalo, bašimane ba be ba nthumula 'ka go ba le mpho,' ka fao ka leka go e fetiša ka dipolelwana tše dingwe le mosadi, yo a mpoditšego gore le ge ke nyaditše seo a mpotšago, 'tšatši le lengwe ke tlo kwešiša se a se lebišitšego. Ka leka go phaela dilo tše ka morago ga monagano wa ka, ke šoma mešomong e fapanego, ke sa kgotsofale, ke tloga lefelong le lengwe ke eya go le lengwe, ke swanetše go hlaka ka baka la lehu la mogatšake le ngwanake, le manyami a mangwe a mantši ao a bego a ka šita go rwalwa ke pelo ya motho. Ka nyaka khutšo le kgotsofalo dilong tšohle tše di ka eleletšegago, eupša go bonala gore go na le sekgoba se e ka bago dinoko tše lesome ka godimo ga legopo la bohlano la mmele wa motho leo le ka se tlalego go fihlela Kriste a tsena. Gomme ntle le dillo tša ka, go be go fela go eba le maikwelo a se sengwe seo se nkukametšego, se oketša manyami a ka. Mafelelong, go rata tlhago ga ka gwa ntira gore ke be

mohlokomed i wa diphoofolo wa naga ya Indiana, ye e nkišitšego mafelong a a fapanego a naga.

'Tšatši le lengwe ke be ke eme ka peseng ye e tletšego kudu ya go ya Henryville, Indiana, gomme, ke ekwa gore yo mongwe o ntebeletše, ka retologela go para ya mahlo a a bonalago e le a masehla-bja-tšipi, a bego e le a mosadi yo a bonalago gabotse. A re gonna, "O bodutwaneng, a ga o bjalo?"

"Aowa, mma," ka araba gomme ka tšwela pele ka lebelela ka letsikangope, ke nagana gore o gogilwe ke mo-aparo gomme a no rata go bolela.

A bolela gape, "Mohlomongwe go ka ba kaone go ka itlhaloša. Ke nna motsebi-wa-dinaledi."

"Go lokile," Ka gopola, "Ke be nka kwa seo a ka se bolelago le nna."

"Ruri o nyatša se, a ga go bjalo?"

"Ee mma, ke bjalo."

"O nagana gore ke tlo bolela le wena ka bodumedi, a ga o bjalo?"

"Ga ke tsebe."

"Ke wene wa bodumedi, a ga o yena?"

"Aowa mma."

"Mohlomongwe nka go botša se sengwe ka wene. O tšwa bodikela a ga o tšwe ntshe?" a mpotšiša.

"Aowa mma."

"Gomme o nyaka go ya bodilela."

"A go lokile, go a fapana. Gantši ke rate go ya bodikela," Ka araba, ka nagana gore nka mo goka gore a bolele gomme a bapetša le seo batseba-dinaledi ba bangwe ba ka se bolelago.

"Lebaka la seo ke matswalo a gago," a tšwela pele.

"O tsebang ka matswalo a ka?" Ka botšiša ke hlokofetše.

"Lesogana, ge nka go botša nako ye o belegwego, a o ka ntumela?"

"Go lokile, ke tloga ke le modumedi wa mathomo, gomme ge motho a mpotša therešo, ke swanetše go e dumela," ka araba. Gomme ka sa dumela seo — ge e le therešo, ke therešo.

Bjale, le se ke la mpotšiša ka mokgwa wo a se dirilego, eupša o mpoditše motsotso wo ke belegwego ka wona. Go be go eme mothalalewatleng yo monnyane ka morago gaka, gomme ka mmotšiša ge eba a ka mmotša ge a belegwa. A re a ka se kgone, gomme, ke sa kwešiše se, ka mmotšiša gore ke ka baka lang a kgonne go mpotša gomme a se kgone go mmotša. A re ke ka gobane go na le seka se se ntšhetšego morago. . . gomme pelo ya ka ya thinya, gobane e bušitše lefsa kgoboko ya se ba bangwe ba mpoditšego sona. A mpotšiša ge eba motseba-dinaledi o ile a bolela pele le nna, gomme ka mmotša aowa, ke botša mosadi yoo maaka.

"A o tseba se sengwe ka ga Jesu Kriste?" a botšiša.

"Ke tseba gore o be a swanetše go ba morwa wa Modimo," e be e le seo nka se bolelago.

"A o tseba se sengwe ka ga mokgwa wo a belegwego ka wona? . . . Ke eng se se tlilego sa mo khunamela pele?"

"Banna ba bararo ba bohlale, ge e ba ke gopola gabotse."

"Ba be ba šetše eng morago?" a tšwela pele.

"Naledi, ke a dumela."

"Go lokile. Nako yeo ba be ba swanetše go ba batseba-dinaledi, gobane ba be ba lebeletše dinaledi," a tiišetsa. "Lesogana, ke boletše le banna ka Ntlong-Tšhweu. Ke fahlošitše Mopresidente Harding ka ga lehu le le makatšago la gagwe,

gomme ke na le se nka go botšago ka sona. O belegwe ka tlase ga naledi e nngwe go ba motho yo a filwego. A moruti yo mongwe ga se a go botša seo?"

"Ga ke na taba le baruti," ka fetola.

"Bjale ntheetše: Ge Jesu Kriste a belegwa, go be go na le banna ba bararo ba Bohlabela ba ba bego ba latela seo ka setlwaedi se bitšwago naledi; eupša go be go tloga go le dinaledi tše tharo tše di kopanego Bethlehem, gomme tša kopana, tša dira naledi e tee ye e ukametšego Kriste. Nako yeo, Modimo o rometše Mpho e kgolo yeo A e neilego lefase, Morwa wa Gagwe a tswetšwego a nnoši. Ge banna ba bohlale ba tlogile, dinaledi tše tharo tša arogana gomme tša se ke tša hlwa di kopana go tloga fao. Modimo o fela a bonagatša mediro ya Gagwe magodimong pele A di bonagatša lefaseng, gomme banna ba ba bohlale ba be ba lebeletše diporofeto tša moporofeta Baalam gore naledi e tlo tšwa molokong wa Jakobo," a tšwela pele, a bololla mangwalo a mantši ao ke sego ka a tlwaela, eupša ka theetša ka phišego ge a tšwela pele. "Bjale dinaledi tše ga se tša kopana gape, eupša nywaga e se mekae yohle di putla tsela ya tšona, gomme ge se se direga se bontšha seo go hlompha matswalo a Jesu, go na le mpho e nngwe e rometšwego gape lefaseng. Gomme ge o tswalwa, dinaledi tše di putlile. Go be go na le naledi ye e bego e go latela ge o tsena ka peseng kua Jeffersonville; ke bone naledi godimo ga gago, gomme ga ke kwešiše gore ke ka 'baka la eng ba bangwe ba se ba go botša ka se pele."

Ge go ka se be le yo a sa kwešišego gabotse, ke tla bontšha ka morago gore go šoma ka dinaledi ga go ye ka mangwalo e bile ruri ga se ga gore MoKriste a bapale ka gona (Jesaya 47:13-14) gomme mohlatha-dinaledi yo kakanyo ya gagwe ka naledi-ya Kriste ke tlhathollo ya gagwe, gomme ga e hwetšwe

ka mangwalong. Eupša ke go ya ka mangwalo gore le Sathane a ka fa bohlatse go mpho ya Modimo, gomme ke lebaka laka go anega poledišano ye.

Nako yeo, o ka gopodiša ka mokgwa wo ke bego ke ikwela ka gona. Go fihleng ga ka moo ke bego ke eya, ka leboga mosadi yoo gomme ka fologa pese, eupša ga nka ka tloša go ikwela moo go sa tlwaelegago moo go nkukametšego go ya go ile, go ntiraga gore ke nape ke tšhoge kudu gomme ke taboge, ke nyamile gare ga batho, efela ke sa tšhoga go ba ke nnoši, ke boifa nako yohle ge phefo e tšutla. "A e ka be e era eng moka?" Ka ipotšiša kgafetša-kgafetša. Nako e nngwe ka morago ga seo ka sokologa gomme ka neela bophelo bjaka go Kriste. (Ke ngwadile seswantšho se sekopana ka bophelo bjaka ka pukwaneng e bitšwago "Jesu Kriste ke wa Maabane, Lehono, e tlo ba Yena wa neng le neng.") Ka morago ga ge ke sokologile, moo go diregilego polokelwaneng ye e lego ka morago ga ntlo, ka itswalantšha le tshepedišo ya kereke ya Baptist gomme ka ba mogolo wa motse, ke tiišeditšwe ke Ngaka Roy Davis wa Jeffersonville. Ka morago ga tsošeletšo ya tente ye e ilego ya atlega fao, ba nkagela taberenakele, ye le bjale e sa lego mekgotheng ya bo-8 le ya bo-10, e tsebjago ka la Branham Taberenakele, gomme nywaga e mentši ke be ke atlega bjalo ka moruti, ke kolobeditše dikete-kete tša batho gomme ka bona go sokologa mo go ntši ka letago la Modimo yo Maatla-ka-moka. Le yona nako yeo ke be ke atlega ge ke rapelela balwetši, le ge ke le bjalo ke sa tsebe se e lego sona moka, gomme nako tšohle dipono le dilo tše di makatšago di ntlela, tše palo e ntši ya batho e ka di kgonthišago mo Jeffersonville. Nako e nngwe ka boripana yeo nkago e bolela: Ke be ke le felotsoko Nokeng ya Ohio, ke kolobetša palo e ntši ya basokologi, magareng ga pitlagano e kgolo ya batho ba bokanego lebopong go bona tirelo. E be e le mantšibua a ruthetšego, gomme moo ge magodimo a swana le mphiri, naledi e kgolo e phadimago ya tla

gomme ya lekelela moo ke bego ke eme. Bontši bja lena bo ka gopola ge bo bala pukung ya mehlamo. E ile ya bonala gantši go tloga fao. Nako e nngwe e fetilego ke be ke le toropong e kgolo go swara tirelo ya mašego a mararo, gare ga makgolo-kgolo a batho. Wa mathomo yo ke mo rapeletšego e be e le ngwana yo monnyane, yoo maoto a gagwe a ngangilwego ke bolwetši bja polio, ya mo dira gore a sepele ka menwana. Ka setlwaedi dikopanong tša rena, batheeletši ba be ba inamišitše dihlogo tše di ithobilego ge ke na le mošimane ka matsogong a ka gomme ke mo rapelela, ge go bonala gore seetša se se phadimago se nkapešitše. Ka makatšwa ke go hloka mekgwa ga mohlokomedii ge a thumaša mabone gonna, gomme ge ke bula maahlo a ka ke tlabegile, mola pele gaka go eme naledi ya masa! Ka lahla mošimanyana yola, goba o tabogile matsogong a ka. . . Ga se ka tseba gore go diregileng, gwa bonala o ka re dikwi tšohle mmeleng wa ka di hwile. Ge a wela fase maoto a gagwe a boela sekeng, gomme ya ba la mathomo bophelong bja gagwe a sepela a le mo tlhagong pele ga batho. Batheeletši ba be ba gakanegile; mmagwe a edibala, mosetsana wa MoNasare, yo a bego a le mogwera wa ngwana yoo, o be a bapala piano, "Ngaka e Kgolo," gomme ge a bona mohlolo woo o dirilwego ke Morena wa rena Jesu, a taboga gomme a tšhabela kgojana go ka bago dikgato tše lesomehlano go tloga pianong, a išitše matšogo godimo, a lla gomme a hlaba lešata. . . gomme ke a tseba ga e kgodiše, eupša makgolo-kgolo a ka kgonthiša se. . . piano yela ga se ya ka ya tlogela molodi, eupša ya tšwela pele e opela pina yeo. Dilo tše kgolo tše ntši di diregile. Batho ba go feta makgolo-šupa ba neela dipelo tša bona go Kriste bošego bjoo. Bontši bja lena ba le bego le le mo le tlo bala se. . . Modimo a le šegofatše. Ke sa fela ke leka tšohle nka di kgonago go direla Kriste.

Bjale ke tsela ya tlhathollo mabapi le potšišo ye e tlago kgafetšakgafetše. Baruti ba bantši ba mpotšišitše, "Ngwanešu

Branham, a o nagana bjang ka go ithuta ka dinaledi? A o dira se ka maatla a thuto-ya-dinaledi, gomme ge go se bjalo, ke ka lebaka lang o ba fa sebaka sa go porofetela batho ka dilo tše?" Nka fo bolela se fela: mpotše lefelo le tee mo lefaseng moo maatla a thut'a-dinaledi a lego a fodiša balwetši. Go bohle balebeledi ba-dinaledi, babolela-mahlatse, didupe, bj.bj. tše lefase le di tsebilego, mpotše moo e mongwe a ilego a budulla maahlo a sefofu, difoa tša kwa goba dimuma tša bolela. Go na le tsela e tee fela. . .ka leina la Jesu Kriste le ka madi a Gagwe a tšholotšwego Sefapanong. Eupša se se mmakatšago, (matšatšing a fetilego bjalo ka lehono) ke dintilha tša go swana le tše latelago: ge Mpho e letše legopong, baperisita ba le ka tempeleng ba ngangišana ka gore a tsogo ya bahu e gona goba aowa, gomme ka yona nako yeo, sehlopha sa banna ba bohlale sa betoga kgole gomme ba lemoga Mpho ya Modimo lefaseng. Ruri, ke re thutadinaledi ke ya maatla a šele, eupša le diabolo a ka hlatsela ka mpho ya Modimo. Le ge go ka ba banna ba bohlale e le bomang goba eng. . .ba ile ba hlatsela ke mpho ya Modimo gomme ba tla ba mo khunamela pele ga baperisita tempeleng. Gape ge Paulo le Silase ba le kua Filipi, le baperesita le baruti ba naga yeo ba ile ba ba bitša baferikanyi gomme ba ba gogela kgolegong, sedupe se sengwe se sennyane se goeletša batho gore banna bao ba romilwe ke Modimo go tlo ba bontšha tsela ya phološo. A ga go makatše gore mosetsana yo wa lekgoba, a tletšego ka moyo o mobe, o lemogile maatla a Modimo go Paulo le Silase, le ge bagolo ba ile ba se ba amogelete. A seo se be se sa makatše, ka mohlala o mongwe, ge ba bantši ba be ba re Jesu ke Belesebubu, diabolo ka monneng a gowa gomme a re ba tsebile gore ke Yena mang. . .diabolo a ipolela mo semoyeng sa Gagwe, gomme Bafarisei ba re O be a le diabolo. Le lehono go bjalo, ge ba bantši ba belaela gomme ba ikgakantšha ka dithuto le dikgopololo, e bile ba ba gakiša batho go ya dikopanong tša phodišo, ge mpho ya semoya ya Modimo e šoma lefaseng

gomme ba bantsi ga ba e hwetše. Jo, badiredi! Ke tshepha Modimo gore le tlo phafoga. E sego ka gobane ke dirilwe morwadi wa mpho ye, ga ke na taba le go tla ga yona. . . Modimo o e rometše. Ge bana ba Israele ba le kua tlase Egipita ba llela molopolodi, Modimo a roma morongwa wa Gagwe go Moše. Moše o be a se na taba le yona. . . e be e le morongwa wa Modimo a dirilego Modiro, a dirilego mehlolo. Moše e be e fo ba molomo wa morongwa wa Modimo, gomme ke sona se ke lego sona lehono fela. . . molomo wa morongwa fela.

Ke swanetšwe go le botša ka morongwa le ka go tla ga Mpho. Nka se lebale nako, la Meyi 7, 1946. . . Sehla se se botse kudu ka Indiana, moo ke bego ke sa šoma bjalo ka mohlokomela-diphoofolo. Ke be ke tlile gae go ja tša mosegare, gomme ka fo rarela le ntlo ke apola sethunya sa ka, ge mogwera wa ka wa bohloko a mpatamela gomme a nkgopela go ya Madison le yena mosegare woo. Ke mmoditše gore ga go kgonege bjalo ka ge ke swanetšwe go leta, gomme ge ke sa dikologa ngwakong ka tlase ga mohlare wa mmapholo, gwa bonala nke bogodimo bjohle bja mohlare bo hlephile. Go bonala gore selotsoko se theogile ka mohlare woo bjalo ka ledimo le tšutlago. . . ka thekesela. . . ba kitimela gonna. . . mogatšake a tšwa ka ngwakong, a tšhogile, 'mme a mpotšiša gore molato ke eng. A leka go ntshwara, ka dula fase gomme ka mmotša gore ka morago ga nywaga ye e masomepedi ya go tla ba ke etetšwego ke maikwelo a a mohuta wo makatšago wo, nako e tlile ge ke swanetšwe go tsebišiša se e bego e le sona sohle, goba ke be nka se bowe gape. Mathata a tlile. Ka mo laela yena le ngwanake, gomme ka mo lemoša gore ge nka se bowe ka pele, a seke a ntebelela. Gomme mo, mmadi yo a rategago, ke seripa sa ponagalo e makatšago ye e amanago le phodišo ya lena, ka fao bala ka thapelos-tlalo le tlhokomelo. Mosegare woo ka ya lefelong la sephiri go yo rapela le go bala Beibele ya ka. Ka tsenelela thapelos; gwa bonala nke moyo wohle wa ka o tlo

gagoga gonna. Ka lla pele ga Modimo . . . ka lahlela sefahlego sa ka fase. Ka lebelela go Modimo godimo 'mme ka lla, "Ge o ka ntshwarela ka tsela ye ke dirilego, ke tlo leka go dira gabotse . . . ke nyamile kudu ge ke ile ka nyatša nywaga ye yohle ge ke dira modiro wo o nyakilego gore ke o dire . . . a o ka bolela le nna ka tsela e nngwe, Modimo? Ge o sa nthuše, nka se tšwele pele." Nako yeo mo bošegong, ka nako ya go ka ba iri ya lesometee, ka tlogela go rapela gomme ke dutše gabotse ge ke bona seetša se gadima ka phapošing. Ka nagana gore yo mongwe o tla ka sebonegi, ka lebelela ka letsikangope, eupša le o tee o be a se gona, gomme ge ke pekwa, seetša se be se tletše lebatong, se katologa. Bjale ke a tseba gore se se bonala se le makatša kudu, bjalo ka ge le nna e ntiragetše, eupša gopola, phodišo ya lena e ya le gore le a e dumela, bjalo ka ge le tla bona ka morago. Ge seetša se tlala, ruri ka tlalelwa gomme ka thoma go tloga setulong, eupša ge ke lebelela godimo, ka bona naledi yela e kgolo e ukametše mola. Le ge go le bjalo, e be e se na le dintilha tše tlhano boka naledi, eupša e bonala bjalo ka kgwele ya mollo goba seetša, se bonegela tlase lebatong. Ka yona nako yeo ka kwa yo mongwe a sepela a putla lebatong, seo se mmakaditšeego gape, bjalo ka ge ke sa tsebe motho a ka tlago moo kgauswi le nna. Bjalo, ge ke tsena seetšeng, ka bona maoto a motho a etla go nna, a le mo tlhagong boka ge o ka tla gonna. O bonetše e le monna yo, ka boima bja motho, a ka bago le boima bja go ka ba makgolo-pedi, a apere seaparo se sešweu, wa sefahlego se thelelagoo, a se na maledu, eupša a na le moriri o moso wo fihlago magetleng, ka lebala lele swana, ka sefahlego se se edilego, gomme a batamela kgauswi, maahlo a gagwe a lebana le aka, gomme ge o bona ka moo ke tšhogilego, a thoma go bolela. "Se boife." Ke romilwe go tšwa bogoneng bja Modimo yo Maatl-a-ka-moka go go botša gore bophelo bja gago bja go se tlwaelege le 'tsela tša gago tša go se kweššege di bile gona go bontšha gore Modimo o go romile go tšea mpho ya phodišo ya semoya go iša bathong lefaseng. GE O KA BOTEGA,

GOMME WA KGONA GO DIRA BATHO GORE BA GO DUMELE, PELE GA THAPELO YA GAGO GO KA SE EME SELO, LE GE E KA BA PHEHLI." Mantšu a ka se kgone go bonagatša ka mokgwa woo ke ikwelego. O mpoditše dilo tše ntši tseo ke hlokago sebaka sa go di gatiša mo. O mpoditše ka moo ke tlogo kgona go bona malwetši ka go thothomela ga letsogo la ka. A sepela, eupša ke mmone gantši go tloga nako yeo. O bonagetše go nna, mohlomongwe gatee goba gabedi ka sebaka sa 'kgwedi tše selelago gomme a bolela le nna. Dinako di se kae o bonagetše go le babangwe. Ga ke tsebe gore ke mang, ke tseba fela ge e le motseta wa Modimo go nna.

Go se bohlokwa go bolela, ka thoma go rapelela balwetši. Ga ke nyake go tsea maemo a ngaka... Ke nagana gore Modimo o beile dingaka mo go thuša tlhago, eupša e fo ba batho fela... Modimo ke yo maatla-ohle. Dilo tše kgolo tše di diregilego mo kgwedding tše masome-pedi-tee ke tše di sa balegego go ka gatišwa, eupša Modimo o tiiseditše mantšu a morongwa nako ka morago ga nako. Difo, dimuma, difofu, mekgwa yohle ya malwetši di fodišitšwe, le diketekete tša mabohlatse di gatišitšwe le lehono. Ga ke na maatla a ka go dira se... ke nna motho wa go hloka mohola go fihlela ge ke ekwa bogona bja Gagwe. Batho ba bantši ba tsenetšego dikopano tše ba tseba gore malwetši a bona le dibe ba di boditšwe mo pele ga lešaba. Mmadi yo a rategago, hle o se ke wa se kwešiše tsela ya ka e šokišago, ya go se rutege ya go tliša tše tšohle go lena. Ke bolela se gore le kwešišiše ka moo le ka ikgobelelagoo mpho ya Modimo. O mpoditše gore ke botege gomme ke dire batho gore ba dumele, gomme ke sona se ke lekago go se dira. Gopola, ga re botšiše bokgoni bja Modimo, re tseba gore O kgona go dira dilo tšohle, eupša bothata ke go dira yo mongwe go dumela yo mongwe. Modimo nako tšohle o na le se sengwe goba yo mongwe a ka šomago ka yena, gomme nna ke fo ba šešomišwa se se šomišwago ke Yena. Ga go motho wa nama a

ka itšeago gore o dira mehlolo, gomme nna ke wa nama. Ga ke tsebe gore Modimo o tlo ntumelela go dira se go fihlela neng, eupša ka mogau wa Gagwe, ke ikemišetša go Mo-direla gabotse ka fao ke tsebago ka gona ka go direla batho ba Gagwe ge fela A sa ntumelela go phela.

Ke fetša, go lena ba le nyakago phodišo mo dikopanong tše. A ke tlogele melao ye e mebedi gore le e latele, gore le hwetše seo le se emetšego go tšwa go Modimo.

1. Le swanetšwe go dumela bohlatse bjo ke le boditšego bjona, le gore Mpho ye ya Phodišo, ke e filwego ke Morena Jesu Kriste, ke tsela ye Modimo a e beetšego phodišo ya lena.
2. Tshepišang go phelela Modimo ka dipelo tša lena ka moka bophelong bja lena ka moka.

Voice Of God Recordings, South Africa Office

P.O. Box 178, Somerset West, 7129 Cape Province, Republic Of South Africa

NORTH SOTHO

©1992 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org